

tautoko a te iwi i ta koutou pepa. Nga Kai-Hautu o tena haahi o tena haahi nga iwi kaore i matau he pepa Maori ano ta tatou kua rongo, kua kite, kua tango. Tenei e pukai atu nei nga mihi nunui, nga kupu tautoko, nga tumanako kia piki rawa te maha o nga Kai tango, me te pai hoki o nga korero ako, arahi, tohutohu, whakamarama e tukua tikatia atu ana ki te tangata takitahi, ki te hapu, ki te iwi ranei ahakoa Maori, pakeha ranei, e puta ana ranei aua whakamarama i roto i te pepa, na a koutou mihi mai ka kitea iho te manaaki, no reira ka mihi atu kia koutou katoa:—

I roto i o tatou tutukitanga ki nga pouri me nga mea whakamamae i te tinana me te hinengaro i te tau tawhito ka whakahemo, nei, kia whiwhi koutou katoa ki nga manaakitanga a Te Rungarawa i nga ra o Te Kirihimete me nga Tai Whakaki o Te Tau Hou tae noa ki ona Tai Timu.

Kia Aroha tetahi ki tetahi. Nga whanau, nga hapu, nga iwi, nga ropu, nga huihuinga tangata tukua mai a koutou whakaaro ngaro, a koutou whakaaro makoha, mou ake, mo koutou ranei mo era atu ranei ma ta koutou Nupepa nei ara ma Te Toa Takitini e whakamarama takitahi, whanui ranei, kei tahau, kei ta Nga Etita i kite me pera, ka horahia peratia ki Te Motu.

He koha nui hoki mehemea koutou e tango nei i te pepa, ki te riro mai i koutou kia rima atu tangata ma tena ma tena hei tango i te pepa, kore e kore te tupu kaha o ta tatou taonga e mihia nuitia nei tenei ra.

E nga Kai-tango o Te Toa Takitini, ina ta koutou mihi ki Te Motu:—

E nga Pihopa, e nga Tohungatanga, e nga Mangai, e nga Kaumatua o nga Haahi maha o Te Iwi Maori, e Te Maui Pomare, e Ta Nagta, Tau Henare, e Tuiti Makitamara, e Rikihana, nga pu-korero o nga hau e rima, e nga Rito Toetoe-mata a mea tupunu, a mea tupuna, Kia Meri Kirihimete Kia Hapi Nui kia koutou katoa.

PITOPITO KORERO

Ko te Kawana Hou mo Niu Tireni nei ko Lord Bledisloe. Hei nga ra o Pepuere 1930 ka tae mai. He tino tohunga taua tangata mo nga ahuwhenua.

Ko Honore T. M. Wilford te kai riiwhi mo Ta James Parr, hei mangai mo Niu Tireni ki Ingarangi.

Ka ora te mare i te **WOODS' GREAT PEPPERMINT CURE.**